

Na osnovu člana IV 4.a) Ustava Bosne i Hercegovine, Parlamentarna skupština Bosne i Hercegovine na sjednici Doma naroda, održanoj ..... 2010. godine, i na sjednici Predstavničkog doma, održanoj ..... 2010. godine, usvojila je

**Z A K O N**

**O CARINSKIM MJERAMA ZA  
ZAŠTITU PRAVA INTELEKTUALNE SVOJINE**

**GLAVA I - OPŠTE ODREDBE**

**Član 1.**

(Predmet)

(1) Ovim zakonom propisuju se carinske mjere koje Uprava za indirektno oporezivanje (u daljem tekstu: UIO) preduzima u vezi sa robom koja je predmet carinskog postupanja, a za koju postoji opravdana sumnja da se njome povređuje pravo intelektualne svojine, te uslovi i postupak za provođenje tih mjera u slučajevima:

- a) kada je roba prijavljena za carinski postupak puštanja u slobodan promet,
- b) kada je roba prijavljena za izvoz ili ponovni izvoz,
- c) kada se u provođenju mjera carinskog nadzora u skladu sa carinskim propisima pronađe roba koja se unosi u ili iznosi iz carinskog područja Bosne i Hercegovine,
- d) kada se roba stavlja u carinski postupak: provoza, carinsko skladištenje, unutrašnju obradu, obradu pod carinskom kontrolom, spoljnu obradu i privremeni uvoz,
- e) kada se roba smješta u slobodnu zonu ili slobodno skladište.

(2) Ovim zakonom propisuju se i carinske mjere koje UIO preduzima nakon što je pravosnažnom odlukom nadležnog suda utvrđeno da se robom iz stava (1) ovoga člana povređuje određeno pravo intelektualne svojine.

**Član 2.**

(Roba kojom se povređuje pravo intelektualne svojine)

(1) U svrhu primjene ovog zakona, roba kojom se povređuje pravo intelektualne svojine smatra se:

- a) krivotvorena roba, kojom se smatra:
  - 1) roba, uključujući i njeno pakovanje, koja je bez odobrenja obilježena znakom koji je identičan žigu valjano registrovanom za istu vrstu robe, ili koji se u bitnim karakteristikama ne može razlikovati od takvog žiga, i koja time povređuje pravo nosioca tog žiga prema propisima u Bosni i Hercegovini,
  - 2) svaki znak zaštićen žigom (logotip, etiketa, naljepnica, uputstvo za upotrebu ili garantni list koji sadrži znak, i drugo), čak i ako je odvojen od robe, pod istim uslovima kao i roba iz alineje 1) ove tačke,
  - 3) pakovanje obilježeno žigom krivotvorene robe, a koje se podnosi odvojeno pod istim uslovima kao i roba iz alineje 1) ove tačke,
- b) piratska roba, kojom se smatra kopija ili imitacija robe ili roba koja sadrži kopiju ili imitaciju robe, koja je izrađena bez odobrenja nosioca autorskog ili srodnih prava ili nosioca industrijskog dizajna ili bez odobrenja osobe koju je ovlastio nosilac prava, bez obzira da li su navedena prava registrovana u skladu sa važećim propisima, ako se izradom tih kopija

- povređuje autorsko ili srodna prava ili prava iz industrijskog dizajna koja vrijede u Bosni i Hercegovini,
- c) roba kojom se povređuju prava iz patenta, prema propisima u Bosni i Hercegovini,
  - d) roba kojom se povređuje oznaka geografskog porijekla, prema propisima u Bosni i Hercegovini,
  - e) roba kojom se povređuje pravo zaštite novih sorti bilja, prema propisima u Bosni i Hercegovini,
  - f) roba kojom se povređuju prava u vezi topografije integriranih kola, prema propisima u Bosni i Hercegovini.

(2) Roba kojom se povređuje pravo intelektualne svojine smatra se i bilo koji kalup ili matrica koji su posebno dizajnirani ili prilagođeni za proizvodnju robe kojom se povređuje pravo intelektualne svojine, ako se upotrebom takvog kalupa ili matrice povređuje pravo intelektualne svojine prema važećim propisima u Bosni i Hercegovini.

### **Član 3.**

(Nosilac prava intelektualne svojine)

(1) Nosilac prava intelektualne svojine u svrhu primjene ovog zakona (u daljem tekstu: nosilac prava), smatra se:

- a) lice koje je nosilac žiga, autorskog ili srodnih prava, prava na industrijski dizajn, patenta, zaštićene oznake geografskog porijekla, te uopšteno bilo kojeg prava navedenog u članu 2. stav (1) ovog zakona,
- b) svako drugo lice ovlašteno za korištenje bilo kojeg prava intelektualne svojine navedenog u tački a) ovog stava (u daljem tekstu: ovlašteni korisnik prava),
- c) zastupnik nosioca prava i zastupnik ovlaštenog korisnika prava.

(2) Nosioca prava ili ovlaštenog korisnika prava može zastupati fizičko ili pravno lice u skladu sa važećim propisima, uključujući i:

- a) organizaciju za kolektivno ostvarivanje autorskog ili srodnih prava čija je jedina ili glavna svrha kolektivno ostvarivanje autorskog ili srodnih prava,
- b) organizaciju ili zastupnika koji je podnio zahtjev za registraciju zaštićene oznake geografskog porijekla ili za registraciju prava zaštite novih sorti bilja.

### **Član 4.**

(Izuzete od primjene)

Ovaj zakon se ne odnosi na:

- a) robu koja je obilježena žigom uz odobrenje nosioca žiga, ili ako je roba koja je obilježena zaštićenom oznakom geografskog porijekla, ili koja je zaštićena patentom, autorskim ili srodnim pravima ili industrijskim dizajnom ili biljnom sortom, izrađena uz odobrenje nosioca prava, ali je bez odobrenja nosioca prava stavljena u carinski odobreno postupanje ili upotrebu iz člana 1. stav (1) ovog zakona,
- b) robu iz tačke a) ovog člana koja je proizvedena ili zaštićena nekim drugim pravom intelektualne svojine navedenim u članu 2. stav (1) ovog zakona pod uslovima drugačijim od onih koji su ugovoreni sa nosiocem prava,
- c) robu nekomercijalne prirode sadržanu u ličnom prtljagu putnika, ako se unosi, odnosno šalje u količini i vrijednosti koja je, shodno važećim carinskim propisima, oslobođena od plaćanja uvoznih dažbina i nije dio komercijalnog prometa.

## GLAVA II - ZAHTJEV I ODOBRENJE ZA PREDUZIMANJE CARINSKIH MJERA ZA ZAŠTITU PRAVA INTELKTUALNE SVOJINE

### Član 5.

(Zahtjev za preduzimanje carinskih mjera  
za zaštitu prava intelektualne svojine)

(1) Zahtjev za preduzimanje carinskih mjera za zaštitu prava intelektualne svojine nosilac prava podnosi UIO u pisanom obliku ili tehnikom obrade podataka (elektronskom razmjenom podataka), ako to omogućavaju tehničke mogućnosti i ako upotrebu takvog sistema odobri UIO.

(2) Zahtjev se podnosi na obrascu iz Priloga 1. ovog zakona, u dva primjerka. Zahtjev mora sadržavati sve potrebne podatke, kako bi se omogućilo da roba koja je u pitanju odmah bude prepoznata od strane carinskog organa, a naročito sljedeće:

- a) tačan i detaljan opis robe, koji carinskom organu omogućava identifikaciju robe,
- b) ime i adresu kontakt osobe koju je odredio nosilac prava,
- c) sve informacije koje nosilac prava može imati, a koje su specifične za vrstu ili način povrede prava intelektualne svojine navedenog u zahtjevu,
- d) vremenski period u kojem se zahtjeva preduzimanje carinskih mjera,
- e) druge raspoložive podatke koji su poznati nosiocu prava, kao što su:
  - 1) vrijednost originalne robe prije oporezivanja na legalnom tržištu u Bosni i Hercegovini,
  - 2) mjesto iz kojega roba dolazi ili predviđeno odredište,
  - 3) podatke za identifikaciju pošiljke ili pakovanja i ambalaže robe,
  - 4) podatke o carinskom organu kojem će, prema očekivanju, roba biti dopremljena (predočena),
  - 5) očekivani datum dolaska i odlaska pošiljke,
  - 6) podatke o prevoznom sredstvu korištenom za prevoz,
  - 7) podatke o uvozniku, izvozniku, primaocu ili držaocu robe,
  - 8) zemlja ili zemlje proizvodnje, te putevi prevoza,
  - 9) tehničke i druge razlike između originalne i robe za koju se sumnja da povređuje pravo intelektualne svojine.

(3) Ako zahtjev podnosi lice iz člana 3. stav (1) tačka a) i b) ovog zakona, uz zahtjev se prilažu isprave koje dokazuju da je podnosilac zahtjeva nosilac prava, i to:

- a) u slučaju prava intelektualne svojine koje je registrovano ili za koje je podnesen zahtjev za registraciju, dokaz o registraciji ili dokaz da je zahtjev za registraciju podnesen,
- b) u slučaju autorskog prava ili srodnih prava ili prava industrijskog dizajna, koje nije registrovano ili za koje nije podnesen zahtjev, dokaz o autorstvu ili statusu izvornog nosioca prava,
- c) izjava iz člana 6. ovog zakona.

Dokazom u smislu tačke a) ovog stava smatra se i ovjeren prepis izvoda iz odgovarajućeg registra.

(4) Ako zahtjev podnosi ovlašteni korisnik odnosnog prava intelektualne svojine, pored dokaza iz stava (3) ovog člana, uz zahtjev mora priložiti i ugovor ili bilo koju drugu ispravu kojom to lice stiče pravo korištenja odnosnog prava intelektualne svojine.

(5) Ako zahtjev podnosi zastupnik nosioca prava ili zastupnik ovlaštenog korisnika prava, pored dokaza iz stava (3), odnosno stava (4) ovog člana, uz zahtjev mora priložiti i punomoć o zastupanju. U slučaju zastupanja, izjava iz stava (3) tačka c) ovog člana mora da sadrži i klauzulu iz člana 6. stav (3) ovog zakona.

(6) Ovisno o vrsti i posebnostima prava intelektualne svojine za koje je podnesen zahtjev, mogu se zatražiti i dodatni podaci, uključujući i podatke o mjestu izrade ili proizvodnje, distribucijskoj mreži i korisnicima licenci.

(7) Uz zahtjev se može dostaviti i uzorak robe koja je predmet povrede prava intelektualne svojine, kao i uzorak originalne robe, fotografije i slično.

## **Član 6.**

(Izjava nosioca prava)

(1) Uz zahtjev za preduzimanje carinskih mjera za zaštitu prava intelektualne svojine, obavezno se podnosi izjava nosioca prava iz člana 3. stav (1) tačka a) i b) ovog zakona koji je podnio zahtjev, ovjerena kod notara. Izjavom nosilac prava prihvata odgovornost za štetu koja može nastati licima koja učestvuju u nekom od carinski odobrenog postupanja ili upotrebe navedenih u članu 1. stav (1) ovog zakona, u slučaju kada su carinske mjere koje su preduzete u skladu sa odredbama ovog zakona prekinute usljed postupanja ili propusta nosioca prava, ili ako se za odnosnu robu utvrdi da ne povređuje pravo intelektualne svojine.

**(2) Izjavom iz stava (1) ovog člana, nosilac prava se obavezuje da će snositi i sve troškove koji nastanu u vezi sa smještajem, čuvanjem i održavanjem robe za koju su preduzete carinske mjere za zaštitu prava intelektualne svojine u skladu sa odredbama ovog zakona, kao i druge troškove koji mogu nastati u skladu sa odredbama ovog zakona.**

(3) U slučaju zastupanja, izjava iz stava (1) ovog člana, pored klauzule kojom nosilac prava na zastupnika prenosi obavezu plaćanja svih troškova koji proizilaze iz preduzimanja carinskih mjera u skladu sa odredbama ovog zakona u njegovo ime, mora da sadrži i klauzulu kojom zastupnik preuzima obavezu plaćanja svih troškova koji proizilaze iz preduzimanja carinskih mjera u skladu sa odredbama ovog zakona u ime zastupanja nosioca prava.

(4) Izjava iz stava (1) ovog člana podnosi se na obrascu iz Priloga 2. ovog zakona.

## **Član 7.**

(Postupanje po zahtjevu)

(1) Odobrenje po zahtjevu za preduzimanje carinskih mjera za zaštitu prava intelektualne svojine podnijetom u skladu sa članom 5. i 6. ovog zakona donosi UIO.

(2) Carinske mjere za zaštitu prava intelektualne svojine odobravaju se za period koji ne može biti duži od godinu dana od dana donošenja odobrenja iz stava (1) ovog člana. Odobreni period primjene carinskih mjera, odnosno prvobitno doneseno odobrenje može se svake godine produžiti za naredni period koji ne može biti duži od godinu dana, uz uslov da su izmireni svi do tada nastali troškovi koji terete nosioca prava shodno odredbama ovog zakona. Zahtjev za produženje važenja odobrenja nosilac odobrenja podnosi UIO najkasnije 30 radnih dana prije isteka važenja odobrenja.

(3) U slučaju da predmetno pravo intelektualne svojine u toku postupka prestane (npr. nije valjano registrovano ili je isteklo), podnosilac zahtjeva obavezan je o prestanku tog prava obavijestiti UIO u roku od osam radnih dana od dana prestanka, bez obzira na osnov prestanka.

(4) Podnosilac zahtjeva dužan je, na zahtjev UIO, dostaviti sve dodatne podatke potrebne za preduzimanje carinskih mjera za zaštitu prava intelektualne svojine.

(5) Na zahtjev za produženje odobrenja za preduzimanje carinskih mjera za zaštitu prava intelektualne svojine na odgovarajući način primjenjuju se odredbe člana 5., 6. i 7. ovog zakona.

(6) Kao radni dan, u smislu ovog zakona, smatra se dan u koji radi Središnji ured UIO.

### **GLAVA III - PREDUZIMANJE CARINSKIH MJERA ZA ZAŠTITU PRAVA INTELEKTUALNE SVOJINE PO ODOBRENOM ZAHTJEVU**

#### **Član 8.**

(Privremeno zadržavanje robe)

(1) Ako carinski organ UIO kojem je roba predočena, temeljem informacije o izdatom odobrenju iz člana 7. ovog zakona, pregleda robe i nakon konsultacije sa imaoцем odobrenja (nosiocem prava), utvrdi postojanje opravdane sumnje da se robom, koja je predmet carinski odobrenog postupanja ili upotrebe navedenih u članu 1. stav (1) ovog zakona, povređuje pravo intelektualne svojine, privremeno će prekinuti dalje provođenje zahtijevanog carinski odobrenog postupanja ili upotrebe i obustaviti puštanje predmetne robe.

(2) U svrhu iz stava (1) ovog člana, uz osiguranje zaštite povjerljivih podataka i obavezu čuvanja profesionalne tajne, UIO je ovlaštena na provođenje svih propisanih carinskih radnji iz djelokruga njenog rada, što uključuje i radnje usmjerene na potvrđivanje elemenata opravdanosti sumnje u povredu prava intelektualne svojine.

(3) Na temelju postupanja iz stava (1) i (2) ovog člana, UIO odmah, u pisanom obliku, donosi odluku o prekidu zahtijevanog carinski odobrenog postupanja ili upotrebe i privremenom zadržavanju robe do prijema pisane obavijesti iz člana 10. ovog zakona, sa kopijom tužbe i dokazom o njenom podnošenju sudu. Odluka se odmah dostavlja nosiocu prava i deklarantu, vlasniku ili licu koje je u posjedu robe u smislu člana 35. Zakona o carinskoj politici Bosne i Hercegovine ("Službeni glasnik BiH", br. 57/04, 51/06 i 93/08), (u daljem tekstu: držalac robe).

(4) U odluci iz stava (3) ovog člana navodi se naziv prava intelektualne svojine za koje se smatra da je povrijeđeno, stvarna ili pretpostavljena vrsta robe, stvarna ili procijenjena količina robe, obaveza deklarantu, vlasniku ili držaocu robe da se u roku od deset radnih dana od prijema odluke pismeno izjasni da li se robom povređuje pravo intelektualne svojine ili ne, obaveza nosiocu prava da, u roku iz člana 10. ovog zakona, podnese dokaz o podnijetoj tužbi za utvrđivanje povrede prava intelektualne svojine ili sporazum o uništenju robe iz člana 15. stav (3) tačka b) ovog zakona, ovjeren kod notara.

(5) Ako se deklarant, vlasnik ili držalac robe, u roku iz stava (4) ovog člana, pismeno ne izjasni da li se robom povređuje pravo intelektualne svojine ili ne, roba se, na zahtjev nosioca prava, može uništiti u skladu sa članom 15. ovog zakona.

#### **Član 9.**

(Postupanje u vezi sa  
privremeno zadržanom robom)

(1) UIO će nosiocu prava i licima uključenim u zahtjevano carinski odobreno postupanje ili upotrebu, u svrhu potvrđivanja, odnosno opovrgavanja sumnje u povredu prava intelektualne svojine, omogućiti pod carinskim nadzorom pregled robe koja je privremeno zadržana po odluci iz člana 8. stav (3) ovog zakona, fotografisanje i uvid u podnesene isprave o unosu robe u carinsko područje Bosne i Hercegovine ili iznosu robe iz tog područja.

(2) Prilikom pregleda privremeno zadržane robe, UIO će, na izričit zahtjev nosioca prava, a isključivo u svrhe analize, te da bi se olakšao dalji postupak, uzeti uzorke te robe shodno važećim carinskim propisima, te ih predati nosiocu prava. Analiza uzetih uzoraka se provodi pod isključivom odgovornošću i o trošku nosioca prava. Ako to okolnosti dopuštaju i zavisno o primjeni člana 15. ovog zakona, uzorci se moraju vratiti nakon završene analize, po mogućnosti prije nego što se privremeno zadržana roba pusti u zahtijevano carinski odobreno postupanje ili upotrebu.

(3) Na robu privremeno zadržanu po odluci iz člana 8. stav (3) ovog zakona odgovarajuće primjenjuju se carinski propisi o privremenom smještaju robe.

(4) Ako je samo za jedan dio prijavljene robe postojala opravdana sumnja da povređuje pravo intelektualne svojine i donijeta je odluka o privremenom zadržavanju te robe, za ostatak pošiljke se, u skladu sa carinskim propisima, provodi traženo carinski odobreno postupanje ili upotreba.

(5) Ako nosilac prava, u roku iz člana 10. ovog zakona, ne podnese dokaz o pokrenutom sudskom postupku za utvrđivanje povrede prava intelektualne svojine ili ne dođe do primjene člana 15. ovog zakona, privremeno zadržana roba će se pustiti u zahtjevano carinski odobreno postupanje ili upotrebu.

(6) UIO će, uz osiguranje zaštite povjerljivih podataka i obavezu čuvanja profesionalne tajne, obavijestiti nosioca prava, na njegov zahtjev i ako je poznato, o nazivu i adresi primaoca, pošiljaoca, deklaranta ili držaoca robe, te o porijeklu robe za koju se opravdano sumnja da povređuje pravo intelektualne svojine.

(7) Nosilac prava koji je, shodno stavu (6) ovog člana, obaviješten smije koristiti tu obavijest, odnosno podatke iz te obavijesti samo u svrhu koja je određena članom 10. i 15. ovog zakona.

(8) Ako drugim propisima nije drugačije propisano, svako korištenje obavijesti iz stava (6) ovog člana suprotno svrsi određenoj članom 10. i 15. ovog zakona, može imati za posljedicu građanskopravnu odgovornost nosioca prava, te dovesti do ukidanja odobrenja iz člana 7. stav (1) ovog zakona ili do neodobranja produženja tog odobrenja.

#### **Član 10.**

(Obavijest o podnošenju tužbe)

(1) Nosilac prava je obavezan, u roku od deset radnih dana od dana prijema odluke iz člana 8. stav (3) ovog zakona, pismeno obavijestiti UIO da je u vezi sa privremeno zadržanom robom nadležnom sudu podnio tužbu za utvrđivanje povrede prava intelektualne svojine, uz koju obavijest mora biti priložena kopija tužbe sa dokazom o njenom podnošenju sudu.

(2) Na temelju obrazloženog zahtjeva nosioca prava, UIO može produžiti rok iz stava (1) ovog člana za daljih deset radnih dana. Zahtjev za produženje roka mora se podnijeti prije isteka roka iz stava (1) ovog člana.

(3) U slučaju lakokvarljive robe za koju se sumnja da se njome povređuje pravo intelektualne svojine, rok iz stava (1) ovog člana iznosi tri radna dana, koji rok se ne može produžiti.

#### **Član 11.**

(Zahtjev za puštanje privremeno zadržane robe zbog moguće povrede prava na industrijski dizajn ili patent)

(1) Ako je, shodno članu 8. ovog zakona, roba privremeno zadržana zbog osnovane sumnje da se njome povređuje pravo na industrijski dizajn ili patent, deklarant, vlasnik, ili držalac robe može, uz polaganje osiguranja (garancije), podnijeti pisani zahtjev za puštanje robe u zahtijevano carinski odobreno postupanje ili upotrebu i ukidanje odluke o privremenom zadržavanju robe, ako su ispunjeni sljedeći uslovi:

- a) da je UIO u roku iz člana 10. ovog zakona, u pisanom obliku, obaviještena o podnošenju tužbe za utvrđivanje da li je prema zakonu povrijeđeno pravo na industrijski dizajn ili patent,
- b) da do isteka roka iz člana 10. ovog zakona nadležni sud nije odredio privremenu mjeru zadržavanja robe,
- c) da su ispunjeni i ostali uslovi propisani za stavljanje odnosne robe u zahtijevano carinski odobreno postupanje ili upotrebu.

(2) Osiguranje iz stava (1) ovog člana mora biti dovoljno visoko kako bi se zaštitili interesi nosioca prava na industrijski dizajn ili patent, a visinu tog osiguranja dogovorom određuju nosilac prava i podnosilac zahtjeva iz stava (1) ovoga člana. Polaganje osiguranja ne može uticati na druga pravna sredstva koja su na raspolaganju nosiocu prava.

(3) Prije preuzimanja robe, podnosilac zahtjeva iz stava (1) ovoga člana, obavezan je podmiriti troškove nastale u vezi sa smještajem, čuvanjem i održavanjem robe.

#### **GLAVA IV - OKONČANJE PRIVREMENOG ZADRŽAVANJA ROBE**

##### **Član 12.**

(Način okončanja privremenog zadržavanja robe)

Postupak privremenog zadržavanja robe, koji je započet donošenjem odluke iz člana 8. stav (3) ovog zakona, okončava se na jedan od sljedećih načina:

- a) stavljanje robe u zahtjevano carinski odobreno postupanje ili upotrebu, ako nosilac prava nije, u roku iz člana 10. ovog zakona, pokrenuo sudski postupak za utvrđivanje povrede prava intelektualne svojine ili nije došlo do primjene člana 15. ovog zakona,
- b) donošenjem odluke o zadržavanju robe do prijema pravosnažne odluke nadležnog suda,
- c) uništenjem robe u skladu sa članom 15. ovog zakona.

##### **Član 13.**

(Stavljanje privremeno zadržane robe u zahtjevano carinski odobreno postupanje ili upotrebu)

(1) Ako nosilac prava ne postupi shodno članu 10. ovog zakona ili ako ne pokrene postupak za uništenje robe pod carinskim nadzorom u skladu sa članom 15. ovog zakona, prestaje privremeno zadržavanje robe i UIO će odobriti stavljanje iste u zahtjevano carinski odobreno postupanje ili upotrebu, ako su ispunjeni ostali uslovi propisani za stavljanje odnosne robe u to postupanje ili upotrebu.

(2) Privremeno zadržavanje robe prestaje i u slučaju ako nosilac prava, u roku iz člana 10. ovog zakona, u pisanom obliku, obavijesti UIO da u vezi sa privremeno zadržanom robom ne namjerava preduzimati mjere shodno odredbama ovog zakona.

##### **Član 14.**

(Zadržavanje robe do prijema pravosnažne odluke nadležnog suda)

(1) Ako nosilac prava postupi u skladu sa članom 10. ovog zakona, UIO, u roku od pet radnih dana od prijema pisane obavijesti o podnošenju tužbe, sa kopijom tužbe i dokazom o njenom podnošenju sudu, donosi odluku o zadržavanju robe do prijema pravosnažne odluke nadležnog suda. Odluka se dostavlja nosiocu prava i deklarantu, vlasniku ili držaocu robe. Ukoliko se odlukom zadržava sva prijavljena roba, odlukom se, ako je to potrebno, poništava podnijeta carinska prijava.

(2) Robu zadržanu po odluci iz stava (1) ovog člana nosilac prava obavezan je, u roku od dva radna dana od dana prijema odluke, o svom trošku, staviti u postupak carinskog skladištenja shodno važećim carinskim propisima i izmiriti sve troškove nastale u postupku privremenog zadržavanja te robe.

(3) Ako nosilac prava robu zadržanu po odluci iz stava (1) ovog člana ne stavi u postupak carinskog skladištenja u roku iz stava (2) ovog člana ili ne izmiri troškove, UIO će odobriti stavljanje zadržane robe u zahtjevano carinski odobreno postupanje ili upotrebu, ako su ispunjeni ostali uslovi propisani za stavljanje odnosne robe u to postupanje ili upotrebu.

(4) Pravosnažnu odluku koju je nadležni sud donio po tužbi za utvrđivanje povrede prava intelektualne svojine, nosilac prava obavezan je dostaviti UIO u roku od osam radnih dana od prijema te odluke.

(5) Ako pravosnažnom odlukom nadležnog suda nije utvrđena povreda prava intelektualne svojine UIO će odobriti stavljanje zadržane robe u zahtjevano carinski odobreno postupanje ili upotrebu, ako su ispunjeni ostali uslovi propisani za stavljanje odnosne robe u to postupanje ili upotrebu, osim ako iz sudske odluke ne proizilazi drugačije.

#### **Član 15.**

(Uništenje privremeno zadržane robe po zahtjevu nosioca prava)

(1) Roba privremeno zadržana po odluci iz člana 8. stva (3) ovog zakona za koju postoji opravdana sumnja da se njome povređuje pravo intelektualne svojine, može se, na zahtjev nosioca prava, uništiti pod carinskim nadzorom, bez obaveze da se prethodno u sudskom postupku utvrdi da li je povrijeđeno pravo intelektualne svojine po važećim propisima.

(2) Uništenje privremeno zadržane robe može se odobriti pod sljedećim uslovima:

- a) da je nosilac prava, u roku iz člana 10. ovog zakona, pismeno obavijestio UIO da roba povređuje njegovo pravo intelektualne svojine i da je dostavio pisani sporazum sa deklarantom, vlasnikom ili držaocem robe o uništenju privremeno zadržane robe pod carinskim nadzorom, ovjeren kod notara,
- b) da je deklarant, vlasnik ili držalac robe, u roku od deset radnih dana od dana prijema odluke iz člana 8. stav (3) ovog zakona, dostavio UIO pisanu izjavu o tome da li se robom povređuje pravno intelektualne svojine ili ne.

(3) Zahtjev za uništenje privremeno zadržane robe podnosi se UIO u roku iz člana 10. ovog zakona, Uz zahtjev, nosilac prava prilaže:

- a) izjavu u pisanom obliku da se privremeno zadržanom robom povređuje njegovo pravo intelektualne svojine, ovjerenu kod notara,
- b) pisani sporazum sa deklarantom, vlasnikom ili držaocem robe o uništenju privremeno zadržane robe pod carinskim nadzorom, ovjeren kod notara.

(4) Ako deklarant, vlasnik ili držalac robe, u roku iz stava (2) tačka b) ovog člana, ne dostavi UIO pisanu izjavu da li se robom povređuje pravno intelektualne svojine ili ne, smatraće se da je uz zahtjev nosioca prava za uništenje privremeno zadržane robe priložen pisani sporazum iz stava (3) tačka b) ovog člana. Ako deklarant, vlasnik ili držalac robe podnese pisanu izjavu da se robom ne povređuje pravo intelektualne svojine smatra se da nisu ispunjeni uslovi za primjenu ovog člana.

(5) Odluku po zahtjevu iz stava (3) ovog člana donosi UIO i dostavlja je podnosiocu zahtjeva i deklarantu, vlasniku ili držaocu robe. Odlukom kojom se odobrava uništenje privremeno zadržane robe poništava se podnijeta carinska prijava, ako je to potrebno.

(6) U postupku donošenja i provođenja odluke iz stava (5) ovog člana odgovarajuće primjenjuju se carinski propisi kojima je uređen postupak uništenja robe pod carinskim nadzorom. Za uništenje privremeno zadržane robe odgovoran je nosilac prava, koji snosi i troškove uništenja te robe, osim ako iz pisanog sporazuma iz stava (3) tačka b) ovog člana ne proizilazi drugačije.

### **GLAVA V - POSTUPANJE SA ZADRŽANOM ROBOM ZA KOJU JE UTVRĐENO DA POVREĐUJE PRAVO INTELEKTUALNE SVOJINE**

#### **Član 16.**

(Postupanje sa zadržanom robom koja povređuje pravo intelektualne svojine)

(1) Roba zadržana po odluci iz člana 14. stav (1) ovog zakona za koju se, pravosnažnom odlukom nadležnog suda, utvrdi da povređuje određeno pravo intelektualne svojine ne može biti:

- a) puštena u slobodan promet,
- b) iznijeta iz carinskog područja Bosne i Hercegovine,
- c) izvezena,
- d) ponovno izvezena,
- e) stavljena u postupak obustave plaćanja ili postupak sa ekonomskim učinkom,
- f) smještena u slobodnu zonu ili slobodno skladište.

(2) Za zadržanu robu za koju je pravosnažnom odlukom nadležnog suda utvrđeno da povređuje određeno pravo intelektualne svojine, UIO će po službenoj dužnosti, donijeti odluku o njenom uništenju pod carinskim nadzorom, ako iz sudske odluke ne proizilazi drugačije.

(3) Na postupak uništenja zadržane robe iz stava (2) ovog člana odgovarajuće primjenjuju se carinski propisi kojima je uređen postupak uništenja robe pod carinskim nadzorom. Troškove uništenja navedene robe snosi nosilac prava.

### **Član 17.** (Troškovi)

(1) Troškovi skladištenja, čuvanja i održavanja robe koja je privremeno zadržana, odnosno zadržana do prijema pravosnažne odluke nadležnog suda u skladu sa odredbama ovog zakona ne padaju na teret UIO, odnosno države Bosne i Hercegovine.

(2) Ako bude odobren zahtjev nosioca prava iz člana 5. ovog zakona, nosilac prava nema pravo na naknadu štete od UIO, odnosno države Bosne i Hercegovine u slučaju ako se ne utvrdi da se robom zadržanom od strane UIO povređuje pravo intelektualne svojine i nastavi provođenje zahtjevanog carinski odobrenog postupanja ili upotrebu.

(3) Nosilac prava nema pravo na naknadu štetu od UIO, odnosno države Bosne i Hercegovine ni u slučaju da roba za koju je odobren njegov zahtjev iz člana 5. ovog zakona nije otkrivena od strane UIO, da je puštena ili da nije pokrenut postupak za njeno zadržavanje.

(4) UIO, odnosno država Bosna i Hercegovina nije dužna da nadoknadi štetu koja može nastati privremenim zadržavanjem, odnosno zadržavanjem robe do prijema pravosnažne odluke nadležnog suda, kao ni u slučaju preduzimanja carinskih mjera po službenoj dužnosti shodno članu 18. ovog zakona.

(5) Troškove koji nastanu u vezi sa smještajem, čuvanjem i održavanjem robe za koju su preduzete carinske mjere za zaštitu prava intelektualne svojine u skladu sa odredbama ovog zakona, kao i druge troškove koji mogu nastati u skladu sa odredbama ovog zakona, snosi nosilac prava, osim ako ovim zakonom nije drugačije propisano.

(6) Primjena ovog zakona ne isključuje pravo nosioca prava da naknadu troškova koje je snosio u skladu sa odredbama ovog zakona zahtjeva od lica za koje se utvrdi da je njegovom robom povrijeđeno određeno pravo intelektualne svojine.

## GLAVA VI - PREDUZIMANJE CARINSKIH MJERA ZA ZAŠTITU PRAVA INTELKTUALNE SVOJINE PO SLUŽBENOJ DUŽNOSTI

### Član 18.

(Pokretanje postupka po službenoj dužnosti)

(1) Ako UIO, pri provođenju mjera carinskog nadzora ili kontrole robe, odnosno pri provođenju carinski odobrenog postupanja ili upotrebe navedenih u članu 1. stav (1) ovog zakona, a prije nego što je zahtjev iz člana 5. ovog zakona podnesen ili odobren, utvrdi postojanje opravdane sumnje da se predmetnom robom povređuje pravo intelektualne svojine, može po službenoj dužnosti (*ex officio*), privremeno, na rok od tri radna dana, prekinuti dalje provođenje zahtijevanog carinski odobrenog postupanja ili upotrebe i puštanje predmetne robe.

(2) U slučaju privremenog prekida shodno stavu (1) ovog člana, UIO donosi pisanu odluku o privremenom prekidu daljeg provođenja zahtijevanog carinski odobrenog postupanja ili upotrebe, koju dostavlja nosiocu prava i deklarantu, vlasniku ili držaocu robe. Rok privremenog prekida od tri radna dana počinje teći od dana kada nosilac prava primi navedenu odluku.

(3) Prije donošenja odluke iz stava (2) ovog člana, UIO može od nosioca prava zatražiti informacije koje su potrebne za potvrđivanje ili opovrgavanje sumnje u povredu prava intelektualne svojine.

(4) U odluci iz stava (2) ovog člana navodi se naziv prava intelektualne svojine za koje se smatra da je povrijeđeno, stvarna ili pretpostavljena vrsta robe, stvarna ili procijenjena količina robe, obaveza deklarantu, vlasniku ili držaocu robe da se u roku od deset radnih dana od prijema odluke pismeno izjasni da li se robom povređuje pravo intelektualne svojine ili ne, te mogućnost nosiocu prava da, u roku od tri radna dana od dana prijema odluke, podnese pisani zahtjev za preduzimanje carinskih mjera za zaštitu prava intelektualne svojine iz člana 5. ovog zakona.

### Član 19.

(Postupanje nosioca prava)

(1) Ako nosilac prava, u roku iz člana 18. stav (4) ovog zakona, podnese zahtjev za provođenje mjera za zaštitu prava intelektualne svojine iz člana 5. ovog zakona, UIO će, na temelju odluke iz člana 18. stav (2) ovog zakona, privremeno zadržati robu za narednih deset radnih dana od dana prijema navedenog zahtjeva, a u slučaju lakokvarljive robe za naredna tri radna dana.

(2) Ako nosilac prava, u roku iz člana 18. stav (4) ovog zakona, ne podnese zahtjev za preduzimanje carinskih mjera za zaštitu prava intelektualne svojine iz člana 5. ovog zakona, UIO će provesti zahtijevano carinski odobreno postupanje ili upotrebu po podnijetoj carinskoj prijavi za odnosnu robu, u kom slučaju troškove snosi deklarant, vlasnik ili držalac robe.

(3) U daljem postupku preduzimanja carinskih mjera za zaštitu prava intelektualne svojine po podnijetom zahtjevu nosioca prava iz člana 5. ovog zakona, odgovarajuće se primjenjuju odredbe ovog zakona koje uređuju preduzimanje carinskih mjera za zaštitu prava intelektualne svojine na temelju odobrenog zahtjeva nosioca prava. Rokovi iz člana 10. i 15. ovog zakona računaju se od dana prijema pisanog zahtjeva nosioca prava za preduzimanje carinskih mjera za zaštitu prava intelektualne svojine.

## **GLAVA VII - OSTALE ODREDBE**

### **Član 20.**

(Odnos prema drugim propisima i pravo žalbe)

(1) Primjena odredaba ovog zakona ne isključuje primjenu drugih carinskih propisa koji uređuju provođenje mjera carinskog nadzora i provjere robe pri rješavanju o carinski odobrenom postupanju ili upotrebi.

(2) Ako odredbama ovog zakona nije drugačije propisano, na postupak po odredbama ovog zakona primjenjuju se odredbe Zakona o upravnom postupku ("Službeni glasnik BiH", br. 29/02, 12/04, 88/07 i 93/09).

(3) Žalba uložena na odluke donijete u provođenju ovog zakona ne odlaže izvršenje tih odluka.

(4) Uputstvo o postupku provođenja carinskih mjera za zaštitu prava intelektualne svojine propisanih ovim zakonom donosi UIO, u roku od tri mjeseca od dana stupanja na snagu ovog zakona.

### **Član 21.**

(Prestanak primjene propisa)

Stupanjem na snagu ovog zakona prestaje primjena odredbi o carinskim mjerama za zaštitu prava intelektualne svojine sadržanih u zakonima kojima su uređena pojedina prava intelektualne svojine.

### **Član 22.**

(Evidencija i razmjena podataka)

(1) UIO je dužna voditi evidenciju o postupcima za preduzimanje carinskih mjera za zaštitu prava intelektualne svojine.

(2) Institut za intelektualnu svojinu Bosne i Hercegovine ili drugi nadležni organ, za potrebe provođenja ovog zakona, dužan je UIO dostaviti ili omogućiti pristup informacijama o registrovanim pravima intelektualne svojine i nosiocima tih prava.

(3) UIO će, na zahtjev Instituta za intelektualnu svojinu Bosne i Hercegovine ili drugog nadležnog organa, dostaviti podatke o kojima vodi evidenciju u skladu sa stavom (1) ovog člana.

## **GLAVA VIII - PRELAZNE I ZAVRŠNE ODREDBE**

### **Član 23.**

(Raniji postupci za zaštitu prava intelektualne svojine)

(1) Postupci preduzimanja carinskih mjera u vezi sa robom kojom se povređuje pravo intelektualne svojine pokrenuti do dana stupanja na snagu ovog zakona, okončaće se prema propisima koji su bili na snazi u vrijeme pokretanja.

(2) Zahtjevi za preduzimanje carinskih mjera za zaštitu prava intelektualne svojine zaprimljeni prije stupanja na snagu ovog zakona po kojima do stupanja na snagu ovog zakona nije pokrenut postupak, smatraće se kao da nisu ni podnijeti.

#### **Član 24.**

(Sastavni dio zakona)

Sastavi dio ovog zakona čine:

- a) Prilog 1. iz člana 5. stav (2) ovog zakona kojim je propisan obrazac zahtjeva za preduzimaje carinskih mjera za zaštitu prava intelektualne svojine,
- b) Prilog 2. iz člana 6. stav (4) ovog zakona, kojim je propisan sadržaj izjave nosioca prava intelektualne svojine o prihvatanju odgovornosti za štetu i troškove.

#### **Član 25.**

(Stupanje na snagu)

Ovaj zakon stupa na snagu osmoga dana od dana objavljivanja u "Službenom glasniku BiH".

PSBiH. broj ..... /10  
..... 2010. godine  
Sarajevo

Predsjedavajući  
Predstavničkog doma  
Parlamentarne skupštine BiH  
Dr Milorad Živković, v.r.

Predsjedavajući  
Doma naroda  
Parlamentarne skupštine BiH  
Sulejman Tihić, v.r.